



Sarajevo, 22. februar 2021.

## **EKONOMSKI FAKULTET U SARAJEVU POTVRDIO SVOJE MJESTO MEĐU NAJBOLJIMA U SVIJETU**

*AMERIČKA AKREDITACIJSKA KUĆA AACSB PO DRUGI PUT DODIJELILA JE EKONOMSKOM FAKULTETU U SARAJEVU INSTITUCIONALNU AKREDITACIJU ZA KVALITET NA MAKSIMALAN PERIOD OD 5 GODINA*

**U februaru 2021. godine, Ekonomski fakultet u Sarajevu (EFSA) oficijelno je reakreditiran institucionalnom AACSB akreditacijom, koju dodjeljuje američka akreditacijska kuća The Association to Advance Collegiate Schools of Business ([www.aacsb.edu](http://www.aacsb.edu)), vodeća institucija za unaprjeđenje kvaliteta obrazovanja na globalnom nivou. EFSA je prva i jedina AACSB akreditirana visokoškolska institucija u Bosni i Hercegovini. Ovim priznanjem, EFSA je zadržao poziciju unutar zajednice pet posto (5%) najkvalitetnijih visokoškolskih institucija iz oblasti ekonomije i poslovanja u cijelom svijetu.**

Prvi put AACSB akreditaciju EFSA je dobio 2015. godine, a reakreditaciji je prethodio petogodišnji proces unaprjeđenja ključnih područja – obrazovanja i učenja, istraživanja te kvalitete programa/kurikuluma.

U periodu 01. – 03. novembra, tročlani AACSB tim kojeg čine dekani renomiranih fakulteta širom svijeta, održao je finalne online sesije u završnoj fazi procesa reakreditacije sa zaposlenicima, studentima i predstavnicima poslovne zajednice. Cilj ovih sesija bio je provjera uključenosti svih ciljnih grupa u procesima ispunjavanja velikog broja standarda koji se odnose na ključna područja djelovanja visokoškolske institucije: strateški menadžment institucije i inovacije, nastavni plan i program/osiguranje ciljeva učenja, te standardi koji se odnose na sve učesnike u procesima institucije.

AACSB akreditacija zahtjeva kontinuiranu posvećenost dostizanju najviših standarda kvaliteta i neprekidno unaprjeđivanje programa koje visokoškolska institucija nudi. Jednom akreditirana institucija prolazi kroz proces reakreditacije svakih 5 godina kako bi se osigurala kontinuiranu posvećenost zahtjevnim AACSB standardima kvaliteta. Standardi AACSB-a, u svijetu važe za najrigoroznije u pogledu zahtijevanog nivoa kvaliteta rada cijele institucije.

Sticanje AACSB akreditacije predstavlja najviše međunarodno dostignuće za visokoškolske institucije koje nude programe iz poslovnih, ekonomskih i računovodstvenih nauka u svijetu. Ova akreditacija je posebno značajna jer Ekonomskom fakultetu u Sarajevu omogućava saradnju sa prestižnim institucijama izvan Bosne i Hercegovine, te predstavlja put međunarodne kvalitete i unaprjeđivanja procesa prema svjetskim standardima.

U Jugoistočnoj Evropi AACSB akreditaciju posjeduje samo pet fakulteta među kojima je i naš Fakultet, a u širem okruženju samo po jedan fakultet u Austriji i Italiji. Svi naši sadašnji i bivši studenti, zaposlenici, te partneri, mogu biti ponosni na činjenicu da pripadamo društvu elitnih i svjetski prepoznatih ekonomskih fakulteta.

*Ured za odnose s javnošću*